



ZARAUZKO UDALA

NITXO, KOLUNBARIO ETA HEZURTEGIEN APAINKETA. UDAL HILERRIAREN ARAUDIA GARATZEKO ARAUAK

SARRERA

Zarauzko udal hilerriaren erregimen eta funtzionamendurako araudiak 40. artikuluan Udalari arau zehatzak garatzeko ahalmena ematen dio udal hilerrian erabili ahal izango diren apaingarriei dagokienean.

Apaingarri horien artean, nitxo, kolunbario eta hezurtegien behin-betiko apaindurazko estalkiak sartzen dira. Araudiak berak dioenez, horiek kontzesioaren titularrak jarri beharko ditu, Udalak adierazitako berezitasunen arabera.

Laister, kontsezioa amaitua duten nitxoetatik gorpuzkinak ateratzeko lanak hasiko dira; eta hezurtegi orokorrera eramango dira, edota, interesatuek hala aukeratuta, banako hezurtegi edo kolunbarioetara. Horregatik, kontzesio desberdinen titularrek jarriko dituzten apaindurazko estalkiei dagokienez bete beharreko arauak ezarri behar dira.

Horretarako, Zarauzko hilerriko nitxoak, kolunbarioak eta hezurtegiak behin-betiko ixteko estalkiak edo hilarriak ondoko araei jarraiki egingo dira.

APAINDURAZKO XEDAPENAK

LEHENENGOA. *Nitxoak ixteko apaindurazko estalkiek bete beharreko baldintzak*

1. Materiala eta neurriak. Apaindurazko estalkia "Sudafrica" granitozkoa izango da, kolore zurikoa, eta haren hutsuneek erretxina gardenaz beteta egon beharko dute. Estalkiak 2 zm.ko lodiera edo fondoa edukiko du; eta hilerriko langile arduradunek jarritako nitxoa kanpotik erabat ixteko adinako neurriak izango ditu.

2. Inskripzioak eta apaingarriak: Zarauzko udal hilerriko nitxoei atxikitako hilarrietan edo apaindurazko estalkietan jarraian zehazten diren inskripzioak edo apaingarriak jarri ahal izango dira:

- a) *Hildako pertsonaren datuak.* Estalkiaren erdian, hildako pertsonaren izena eta, gehienera, bi deitura agertuko dira; beltzez grabatuta, erdian behar bezala jarrita, eta goitik beherantz ordenatuta. Hildakoaren izena, estalkiaren goiko aldetik 25 zm.ko tartera hasi beharko da grabatzen. Izen-deituren azpian heriotza-data edo, aukeran, jaioteguna eta heriotza-data grabatu ahal izango dira; hauek ere beltzez eta zenbakitan. Grabatuko diren letrak eta zenbakiak "RAFAEL" izeneko motakoak izango dira. Batzuen zein besteen karaktereek ezingo dute 40 mm.ko altuera gainditu.

- b) *Ikurrak*. Estalkiaren goiko ezker aldean, erlijiozko izaera nahiz profanoa duen ikurren bat jarri ahal izango da; beltzez grabatuta. Ikurraren neurriek ez dituzte ustezko angeluzuzen baten lerrokadura hauek gaindituko: 20 zm.ko zabalera eta 35 zm.ko altuera, eta estalkiaren goiko aldeetik zein ezkerreko kanpoko aldeetik 5 zm.ko tartera trazatua.
- c) *Argazkia*. Estalkiaren goiko eskuinaldean, hildakoaren argazkia jarri ahal izango da; urre-koloreko marko obalatu batean sartuta. Markoaren neurriek ez dute 10 zm.ko altuera eta 8 zm.ko zabalera gaindituko. Markoak estalkiaren goiko aldeetik 10 zm.ko tartera eduki beharko du, eta eskuineko kanpoko aldeetik 11 zm.koa.
- d) *Lorontzia*. Estalkiaren beheko eskuinaldean, lorontzi bat jarri ahal izango da; atzeko aldeetik estalkira finkatuta. Lorontziak gehienera 29 zm.ko altuera eta 11 zm.ko zabalera edukiko ditu, eta urre-koloreko metalezkoa izango da. Lorontziak estalkiaren beheko aldeetik 5 zm.ko tartera eduki beharko du, eta eskuineko kanpoko aldeetik 9 zm.koa.
- e) *Epitafioak eta oroigarriak*. Izena eta dataren azpian, testu libre bat jarri ahal izango da; behar bezala zentratuta eta beltzez grabatuta. Testuaren neurriak ez du ustezko angeluzuzen baten lerrokadura hauek gaindituko: 35 zm.ko zabalera eta 20 zm.ko altuera. Testuak estalkiaren beheko aldeetik gutxienez ere 5 zm.ko tartera eduki beharko du, eta erabiliko den letra-motak ezingo du hildakoaren izena grabatzeko erabilitako letraren tamaina gainditu.
- f) Argazkiaren eta lorontziaren artean edo ikurraren azpian ezin izango da inolako inskripzioerik grabatu, ezta elementorik jarri.

BIGARRENA. *Kolunbarioak eta hezurtegiak ixteko apaindurazko estalkiek bete beharreko baldintzak*

1. Materiala eta neurriak Apaindurazko estalkia marmol zurikoa eta "Almeria" motakoa izango da; estalkiak 2 zm.ko lodiera edo fondoa edukiko du; eta hilerriko langile arduradunek jarritako kolunbarioa edo hezurtegia kanpotik erabat ixteko adinako neurriak izango ditu..

2. Inskripzioak eta apaingarriak: Zarauzko udal hilerriko kolunbarioei eta hezurtegiei atxikitako hilarrietan edo apaindurazko estalkietan jarraian zehazten diren inskripzioak edo apaingarriak jarri ahal izango dira:

- a) *Hildako pertsonaren datuak*. Estalkiaren erdian, hildako pertsonaren izena eta, gehienera, bi deitura agertuko dira; beltzez grabatuta, erdian behar bezala jarrita, eta goitik beherantz ordenatuta. Hildakoaren izena, estalkiaren goiko aldeetik 9 zm.ko tartera hasi beharko da grabatzen. Izen-deituren azpian heriotza-data edo, aukeran, jaioteguna eta heriotza-data grabatu ahal izango dira; hauek ere beltzez eta zenbakitan. Grabatuko diren letrak eta zenbakiak "RAFAEL" izeneko motakoak izango dira. Batzuen zein besteen karaktereek ezingo dute 30 mm.ko altuera gainditu.
- b) *Ikurrak*. Estalkiaren goiko ezker aldean, erlijiozko izaera nahiz profanoa duen ikurren bat jarri ahal izango da; beltzez grabatuta. Ikurraren neurriek ez dute ustezko karratu baten 5 zm. aldea gaindituko; eta estalkiaren goiko aldeetik 2 zm.ko tartera trazatu beharko da.

- c) *Argazkia*. Estalkiaren goiko ezker aldean, hildakoaren argazkia jarri ahal izango da; zilar-koloreko marko obalatu batean sartuta. Markoaren neurriek ez dute 6,5 zm.ko altuera eta 5,2 zm.ko zabalera gaindituko. Markoak estalkiaren goiko aldetik 2,75 zm.ko tartea eduki beharko du, eta ezkerreko kanpoko aldetik 2,4 zm.koa.
- d) *Lorontzia*. Estalkiaren beheko eskuinaldean, lorontzi bat jarri ahal izango da; atzeko aldetik estalkira finkatuta. Lorontziak gehienera 12,2 zm.ko altuera eta 7,2 zm.ko zabalera edukiko ditu, eta marmol zurizkoa izango da. Lorontziak estalkiaren beheko aldetik 0,5 zm.ko tartea eduki beharko du, eta eskuineko kanpoko aldetik zm. 1ekoa. Aurreko aldea kurbatua edukiko du eta estalkitik 3,5 zm. nabarmenduko da.

HIRUGARRENA. *Xedapen orokorrak nitxo, kolunbario eta hezurtegiengiztat*

1. Aurreko paragrafoetan zehaztu denetik aparte, nitxo, kolunbario eta hezurtegien apaindurazko estalkietan ezin izango da inolako inskripziorik grabatu, ezta elementurik jarri.
2. Nitxo, kolunbario edo hezurtegi baten kontzezioa ematean, Udalak bere erabakian araudi honen bete beharra jasoaraziko du, eta interesatuari ale bat emango dio.
3. Udalak estalkiak kenduarazi ahal izango du, baldin eta horiek apaindurazko xedapen hauek betetzen ez badituzte; eta, halaber, pertsonen duintasen aurka doazen edo kokalekuaren ingururako itsusgarri, lotsagabe edo desegokiak diren epitafio, oroigarri edo ikurrak jartzen badira hilarrietan.

DATUAK

| | |
|-----------------------------|----------------------------------|
| Hasierako onespina | 1999ko irailaren 15ean |
| GAOn iragarkia: | |
| Alegazioak aurkezteko epea: | |
| Behin betiko onespina | |
| GAOn testua: | 1999ko azaroaren 15ean (218 zk.) |
| Indarrean: | |

ALDAKETA 2001

| | |
|-----------------------------|---------------------------------|
| Hasierako onespina | 2001eko azaroaren 28an |
| GAOn iragarkia: | |
| Alegazioak aurkezteko epea: | |
| Behin betiko onespina | |
| GAOn testua: | 2002ko otsailaren 1ean (21 zk.) |
| Indarrean: | |